

Mr Pancho Geerman:

Conbibencia na Aruba mester ta basa riba principionan di estado di derecho

Cultura di miedo y venganza mester cambia

ORANJESTAD — Un condicion esencial pa hende por biba bon cu otro riba cualkier pais ta respet pa ley y respet pa derechonan, scirbi y no scirbi. Esaki ta un di e factornan mas importante cu mester mantene na dje si Aruba kier logra haya un cultura di conbibencia y progreso sostenibel. Mr. Drs. Pancho Geerman a enfoca riba diferente elemento cu ta permiti un conbibencia sano, y a considera Aruba como un estado di derecho real como esencial. No solamente na nivel di ley, sino tambe na nivel di comportacion cu otro teniendo cuenta cu derecho di un di tur.

“Pa hende por conbibi di un forma ordena paisnan ta implementa forma di goberna. Como pais Aruba ta basa riba e principionan di un estado di derecho. Esaki ta contrario na principionan di un ‘estado di polis’ of un ‘estado di poder,’” Geerman ta señala. “Un estado di derecho ta promove estabilidad politico y social loke ta un pre-requisito pa confiansa di inversionistanan y asina ta sostene economia di un pais basa riba mercado liber.”

Un estado di derecho ta ensera cu comportacion di gobernante y ciudadanonan ta basa riba cuater principio, esta: libertad di hende, democracia, derechonan humano, determinacion y limitacion di poder di gobierno dor di reglanan di derecho. Libertad di ser humano ta ensera cu cada persona ta liber pa move y expresa su mes. E libertad aki ta ensera responsabilidad tambe pa otro. Intencion ta pa conbibi di un forma respetuoso cu otro aceptando cu tin diferencia den puntonan di bista sin cu esaki ta trece cune cu ta descualifica otro hende. “Den e cuadro aki nos mester balora e contribucion economico y social cu imigrante a hasi

y ta hasi na nos pais. Sam Cole a indica den un rapport riba desaroyo turistico cu historicamente 50% di migrantenan ta keda Aruba. For di un estudio hasi dor di CBS un 70% di imigrante a indica di ta desea di keda Aruba.”

CULTURA DI MIEDO Y DI VENGANZA

“Ta na bienestar di nos tur pa conbibi cu otro y brinda otro e mihor como ser humano. Si tur esnan cu ta califica nan mes como Cristian practica e amor pa prohimo y compasion, Aruba lo ta un comunidad cu conoce mas paz y prosperidad,” ta e mensahe di Pancho Geerman.

Un preocupacion cu e tin, ta, cu na Aruba bou cierto gruponan ta existi un ‘cultura di miedo’ cu ta acopla na ‘cultura di venganza’. E dos culturanan aki ta sigui existi tanten cu falta balor propio, conocimiento di bo derechonan, tanten cu falta transparencia di proceduranan pa yega na decisionnan, tanten cu color politico ta determina ken ta bin na remarca pa kico y ki ora.

“Democracia ta ensera cu mayoria ta dicidi cu respet pa minoria. E di dos parti di e definicion di democracia ta hopi desconoci na Aruba. Den desaroyo di humanidad cambionan cu a bira aceptabel a cuminsa cu un minoria p.e. lucha pa igualdad pa hendenan di diferente religion, hende color scur, hende muhe, esnan cu limitacion etc. Mi ta boga pa nos propaga e spirito aki den nos accionnan diario, riba nivel publico y den politica. Esaki ta promove discusion y dialogo sano ariba e problematica cu ta na discusion y no ariba e persona. Di e forma aki nos ta enfrenta reto a base di hecho, conocimiento y escogencia a base di criterionan comun.”

BALOR DI IGUALDAD

Un di e derechonan

fundamental di ser humano ta igualdad di hende sin distincion di sexo, preferencia sexual, color, status, religion. Practica di e derecho aki ta “fortifica nos conbibenciana Aruba y nos relacion cu bishitantenan. Mi ta di opinion cu respet pa tur minoria ta beneficia e desaroyo di e comunidad ya cu minoria sa aserca un situacion for di un angulo creativo y diferente. E hecho cu Direccion di Turismo den su plan actual di mercadeo ta pone cu ta sostene e mercado di homosexualnan pasivamente ta

ensera cu nos mester brinda esnan di Aruba oportunidad y trato igual y no solamente ora e ta combini nos economicamente. Tambe e ta ensera cu nos mester cumpli cu Leynan di Reino den cua ta reconoce actanan oficial incluso matrimonio di mes sexo.”

Determinacion y limitacion di poder di gobierno ta basa riba ley y derecho, e hurista ta enfatisa. Ora ta papia di respeta norma y balornan mester realisa cu esaki ta ensera cu nos tur mester cumpli cu ley debidamente. Leynan di Aruba, Leynan di Reino y Tratado internacional cu ta conta pa Aruba tambe.

SEPARACION DI PODER NO TA TRAHANA ARUBA

Desde cu Aruba conoce

derecho di voto general te ainda e separacion di e poder legislativo y e poder ehecutivo no ta funciona debidamente.

En bez cu Parlamento controla Gobierno/Gabinete di Ministro ta ministranan tin mayoria di Parlamento manera nan mucha manda, ta e observacion di Pancho Geerman.

“Ley di contabilidad ta un instrumento importante pa percura cu recursonan ta wordo uza y responsabilida debidamente. Pesey ta responsabilidad di cada un di nos pa sa kico e ta ensera y keda exige pa cumpli cune debidamente.”

PAPEL DI MEDIA

Geerman a toca tambe e punto cu mas y mas ta reconocibel na Aruba, specialmente den medionan di comunicacion,

cu ta acusacionnan sin base. “Cuanto bez ta condena un persona publicamente sin cu huez a declare culpabel? Cuanto bez no ta condena publicamente veredicto di huez ora cu e sali na favor di contrincante? E comportacionnan aki ta malo pa nos mes y pa nos comunidad. Cuanto biaha nos ta keda sin practica e principio di scucha tur partido involvi den un problema. E forma con medionan di comunicacion ta funciona na Aruba ta ehempel con e no mester ta.”

E ciclo di discurso durante e luna cultural di Biblioteca Nacional di Aruba ta sigui awe nochi, cu presentacionnan di Byron Boekhoudt, Errol Sjak Sjie y Maria Dijkhoff Pita, cuminzando pa 8’or di anochi.

